

NIA Arrests

राष्ट्री जांच एजेंसी — एनआईए नै पहलगाम च 26 बेदोसे सैलानिएं दी हत्तेआ च शामिल आतंकवादिएं गी आसरमा देने आहले द'उं दोषिएं गी गिरफ्तार कीता ऐ। इ'दी पन्छान बटकोट दे परवेज अहमद ते हिल पार्क पहलगाम दे बशीर अहमद दे तौर पर कीती गई ऐ। इ'दें दौनें दोषिएं, बुजदिलाना पहलगाम आतंकी हमले गी अंजाम देने आहले आतंकवादिएं दी पन्छान बी कराई दित्ती ऐ ते इ'नें इब्बी दस्सेआ ऐ जे पहलगाम आतंकी हमले च शामिल त्रवै आतंकवादी, पाकिस्तानी हे जेहड़े लश्करे तैयबा गुट लेई कम्म करदे न। इ'नें दौनें दोषिएं दी गिरफ्तारी गी पहलगाम आतंकी हमले दी जांच च बड़ा महत्वपूर्ण मन्नेआ जा'रदा ऐ।

<><><><><><>

Army Chief Kashmir Visit

सेना अध्यक्ष जनरल उपेन्द्र द्विवेदी होरें औंदी श्री अमरनाथ दी जी सलाना जात्तरा शा पैहले कश्मीर घाटी च सुरक्षा तंत्र दा तफसीली जायजा लैता ऐ। अपने दौरे दरान उ'नें बलें दिएं कार्रवाईएं सरबंधी तैयारिएं ते सुरक्षा सरबंधी खतरें दी समीक्षा कीती ते बलें गी आखेआ जे ओह् अगगे बी सोहगे सतर्क बने दे रौह्ण। सेना अध्यक्ष होरें'गी इस मौके पर टेक्नोलॉजी आधारित निगरानी ते श्रद्धालुएं दी सुरक्षा लेई तैयार कीते गेदे तुरत कार्रवाईएं सरबंधी प्रणालिएं दे बारै च बी अवगत करोआया गेआ। सेना प्रमुख हु'दा एह दौरा होरनें सुरक्षा एजेंसिएं दे तालमेल कन्नै श्री अमरनाथ जी दी जात्तरा गी सुरक्षित ते बवस्थित ढंग्गै सिर करोआना जकीनी बनाने दी फौज दी वचनबद्धता गी दर्शा'दा ऐ।

<><><><><><>

Satish Transport Meeting

जम्मू कश्मीर दे ट्रांसपोर्ट सेवाएं ते शिड़क सुरक्षा गी बधाने दे जतनें च ट्रांसपोर्ट मंत्री सतीश शर्मा होरें जम्मू खित्ते दे हर जिले दे आरटीओ कन्नै इक उच्ची सतह दी समीक्षा बैठक दी प्रधानता कीती। बैठक च ऑनलाइन सेवाएं च सुधार करने, ड्राइविंग लसैंसें दी फौरी दस्तयाबी जकीनी बनाने ते जागरूकता बधाने दी लोड़ पर जोर दित्ता गेआ। मंत्री होरें डरैवरें आस्तै नियमित सेहत जांच ते नशीले पदार्थ दे सेवन दे खलाफ कारवाई करने दे महत्व पर लोह् पाई। उनें श्री अमरनाथ जी दी यात्रा दिएं तैयारिएं दा बी जायजा लैता ते तीर्थयात्रिएं आस्तै इक सुरक्षित ते बेहतर अनुभव दी गारंटी देने आरै तालमेल आली कोशशें दा आग्रह कीता।

<><><><><><>

CS Traffic

मुख्य सचिव अटल डुल्लु होरें जम्मू ते श्रीनगर आस्तै ट्रैफिक प्रबंधन पर बहु-अनुशासनक समिति दी इक महत्वपूर्ण बैठका दी प्रधानता कीती। मुख्य सचिव होरें इस मौके पर भीड़भाड़ गी घट्ट करने ते शैहरी गतिशीलता गी बधाने उप्पर जोर दित्ता। उ'नें बक्ख-बक्ख सरबंधत घड़ें ते आंकड़ें पर आधारत हलें दे बश्कार तालमेल दे महत्व पर लोऽ पाई, बवहारिक आमदोरफ्त प्रबंधन नीतिएं, बेहतर बुनियादी ढांचे, ई-बस सेवाएं, रिंग रोड ते मास रैपिड ट्रांसजिट ज्नेह नमें उपाएं दा आह्वान कीता। एहदे अलावा उ'नें दौनें शैहरें च बवस्थित

जात्तरा अनुभव बनाने दे मकसद कन्नै विभागीय जिम्मेदारिएं ते तरक्की दी निगरानी आस्तै इक बशेश वैब पोर्टल दी जरूरतै पर जोर दित्ता।

<><><><><><>

Sec RDD

ग्रामीण विकास विभाग दे सचिव मोहम्मद ऐजाज असद होरें औंदी अमरनाथें दी जात्तरा दिएं तैयारिएं दे सिलसिले च कल बालटाल ते एह्दे आले—दोआले दे इलाकें दा व्यापक दौरा लाइयै, उत्थे कीते गेदे इंतजामें दी समीक्षा कीती। उ'नें बालटाल आहले आधार शिविर कोला लेइयै पवित्तर गुफा तोहड़ी दे रस्ते च कीते गेदे प्रबंधें ते खड़ेरे गेदे युनिटें दा मुआयना कीता ते जित्थे कुदरै बी कोई कमी पेशी रेई गेदी ऐ उसी उजागर करियै तौले दुरुस्त करी लैने दा निर्देश दित्ता। इस दौरे दरान सरबंघत केई सीनियर अफसर बी उंदे कन्नै गेदे हे। सचिव ऐजाज असद होरें जोर देइयै आखेआ जे पूरे रस्ते च साफ—सफाई लेई अमला सुददी गिनतरी च तैनात रौहना लोडचदा ऐ ते सब्बनें कम्में पर बकायदा निगरानी रक्खी जानी लोडचदी ऐ तांजे कुदरै बी कोई कोताही जां कमी पेशी नेई रेई जा।

<><><><><><>

Summer Vacation

स्कूली शिक्षा निदेशालय जम्मू नै जम्मू खित्ते दे स्याले आहले जोन च हायर सकेँडरी सतह तोहड़ी दे सब्बनें सरकारी ते मान्यता हासल निजी स्कूलें च सोहे दिएं छुट्टिएं दा ऐलान करी दित्ता ऐ। 21 जून 2025 गी जारी हुक्मै मूजब, स्कूल 23 जून कोला 7 जुलाई 2025 तगर बंद रौहडन। माता—पिता, विद्यार्थिएं ते स्कूल प्रशासनें गी सलाह दित्ती जंदी ऐ जे ओह छुट्टियें दी अवधि दे मुताबक गै कुसै बी कार्यक्रम दी योजना बनान। स्कूली गतिविधियां 8 जुलाई शा परतियै शुरु होई जाडन।

<><><><><><>

Special Feature

सेवा, सुशासन ते गरीब कल्याण दे सिद्धांतें पर चलदे होई पिछले 11एं ब'रे च भारत च केई क्रांतिकारी ते सुधारत्मक बदलाव आए न। मजुदा सरकार दे पिछले 11एं ब'रे दे जतनें ते उपलब्धिएं गी उजागर करने लेई आकाशवाणी नै इक विशेष श्रृंखला शुरु कीती दी ऐ जेह्दे तैहत अज्ज अस गल्ल करगे ऊर्जा दे क्षेत्र च हासल उपलब्धिएं ते कामयाबिएं दी। इस क्षेत्र च भारत दऊं उद्देश्येंग ी लेइयै कम्म करा करदा ऐ, जिंदे चा इक ऐ बधदी ऊर्जा दी मंग गी नूरा करना ते टिकाऊपन गी तरजीह देना। अंतर्राष्ट्रीय ऊर्जा अजेंसी आईईए मूजब औंदे 3 ब'रें दरान बिजली दी कुल संसारी सतह दी मंग उभरदे तेविकासशील मुल्खें थमां औग। दुनिया दी सब्बने शा तेजिया कन्नै बधा'रदी अर्थबवस्था दे रूपै च भारत कुल संसारी सतह पर बिजली दी मंग ते उत्पादन दे क्षेत्र च अपना इक मतर महत्वै आला रोल अदा करै करदा ऐ। भारत दी ऊजा दी मंग तेजिया कन्नै बधने दी मेद ऐ ते एह्दे बिजली ढांचे दी टिकाऊपन आली बवस्था आली सोच ते नीति इस मंग गी पूरा करने च मददगार साबत होग। आई.ई.ए. मूजब 2035 तगर कुल संसारी सतह उप्पर उर्जार खेत्तर च भारत दी भागीदारी दूनी कोला मती होने दी मेद ऐ।

<><><><><><>

Rajouri Dharti Aabha

जनजातीय आबादी आहले इलाकें च सार्वजनिक सेवाएं दी बेहतर ढंग्गै'नै दस्तयाबी ते सुशासन दी दिशा च इक महत्वपूर्ण गैह् पुट्टदे होई रजौरी दे डिप्टी कमिशनर अभिषेक शर्मा होरें कोटेधारा च धरती आभा जनजातीय ग्राम उत्कर्ष अभियान दे तैहत लोआए गेदे जागरूकता कैप दा चानचक्क निरीक्षण कीता। इस मौके पर उ'नें, मुकामी लोकें गी उपलब्ध करोआई जा'रदी सेवाएं ते उत्थे लागू कीती जा'रदी सरकार दी कल्याणकारी योजनाएं दी स्थिति दा जायजा लैता। अपने दौरे दरान डिप्टी कमिशनर होरें सरबंधत अधिकारिणें ते जनजातीय समुदाय दे सदस्यें कन्नै गल्लबात करियै धरती आभा जनजातीय ग्राम उत्कर्ष अभियान तैहत कीते गेदे कम्में बारै जानकारी लैती। इ'दा मकसद इस गल्लै गी जकीनी बनाना ऐ जे सभ्मनें योग्य लाभार्थिणें गी सरकार दिणें कल्याणकारी योजनाएं दा लाह हासल होऐ ते जनजातीय आबादी आहले ग्राएं च लोकें गी सशक्त बनाया जाई सकै।

<><><><><><><>